

INUIT ATAQATIGIIT

Inatsisartuni



UKA 2017/109
02.10.17.
Peter Olsen

Unga siunnersuut: Nalunaarasuartaatitigut atassuteqarneq nalunaarasuartaatitigullu kiffartuussinerit pillugit Inatsisartut inatsisaat nr. xx, xx. xxx 2017-imeersoq.

(Kommuninut, Nunaqarfinnut, Isorliunerusunut, Attaveqaatigiinnermut Ineqarnermullu Naalakkersuisoq)

Naalakkersuisunut ilaasortap Naalakkersuisut sinnnerlugit aaliangiiffigisassatut siunnersuutaanut qulaani pineqartumut qujalluta, matumuuna Inuit Ataqatigiinniit imatut oqaaseqaateqassaagut.

Taamatut inatsisartut inatsisaata allanngortinneqarnissaanut Naalakkersuisut siunnersuuteqarnerminni tunngavilersuutaasa ilaagaat upernaakkut ataatsimiinnermi imm. 119 Telep namminersortungorsarneqarnerata unitsinnejarnissaanut tunngasoq, taassumalu saniatigut suliffeqarfissuup iluani aaqqissuussaanikkut ullutsinnut naleqqussaanissaq tunngavilersuutigineqarluni.

Inuit Ataqatigiinniit oqaatigerusupparput, tamaanikkut imm. 119, Telep namminersortungorsarneqarnerata unitsinnejarnissaanut tunngasoq akuersissutigineqarmat assorsuaq Inuit Ataqatigiinniit nuannaarsimaga, pissutigalugu; Taamaliornitsigut nuna tamakkerlugu, inuit amerlanerpaartaasa attaveqaateqarnerup tungaatigut ullumikkumingarnit pitsaanerujussuarmik ineriaortortsivigineqarlillu atugassaqartinnejernissaat qulakkiissagatsigu, imaanngitsoq Nuummi kisimi taamaalaat ineriaortortsisoqassasoq.

Namminersortungorsaaneq ingerlaannarsimagaluarpat, tamatuma kingunerisimasinnaagaluarpaa immap naqqatigut kabelersuup Nuummiit Aasiannut siaarneqartussagaluartup siaarneqanngitsoorneqarnera, tamatumalu aamma kingunerisaanik, Qasigiannguani Ilulissani, Uummannami, Upernavimmilu sakkortusaaviit ikkunneqartussagaluartut ikkunneqanngitsoorneranik.

Telep namminersortungorsarneqarnerata unitsinnejarnissaanut tunngasoq sukkut tamatigut pitsaanerulerlunilu sukkanerulertussaavoq. Torrak tassa ajunngilluinarpoq qujanartoq.

Taamatullu angusaqarsinnaanerput Inuit Ataqatigiinniit nuannaarutigalugulu tullusimaarutigaarput.

Taamanikkornissaanullu qilanaaarpugut, kingusinnerpaamik decemberimi suut tamarmik piareernissaanut; immaqa uffa Maniitsumiit Aasiaat tungaannut innuttaasut, juullimut meerartatik netflix-mik tunisinnaanngorsimassavaat taamanikkornissaanut.

Pissanganaq erininarlu.

Siunnersuummi uani soorlu Naalakkersuisup aamma saqqummiinermi oqaatigigaa, nalunaarasuataateqarnermi oqartussaasut politikkikkut piareersaasartut aammalu oqartussaasut nakkutilliisuuusut

avissaartinneqarnissaat allannguutissat annersarissavaat. Tamannalugooq inatsisartut peqqussutaata atuutup unammilleqatigiinnermut inatsimmut nuunneqarneratigut pissaaq.

Naatsumik oqaatigalugu ataatsimut isigalugu inatsisissatut siunnersuut, naleqqussaanerullunilu nutarterineriinnaammat, Inuit Ataqatigiinnit taperserparput, taamaattumik taamatut oqaaseqarluta Naalakkersuisut siunnersuutaat Inuit Ataqatigiinnit taperserlugu ataatsimiisitaliamut ingerlateqqinneqarnissaa innersuussutigaarput. Ataatsimiisitaliamut ingerlateqqipparput Telep namminersortungorsarunnaarneqarnerata naqissuserneqarnissaa apeqquserneqarsinnaajunnaarnissaalu qulakkeermallugu angusinnaajumallugulu.

Qujanaq

Peter Olsen